



ՁԵՐ ԽՕՍՔԸ ԼՍԵՑԻՆԸ...

ԳԱԼՈՒԲՍ ԿԻԼՊԵՆԿԵԱՆ ՀԻՄՆԱՐԿՈՒԹԻՒՆԸ ԿԸ ՅԱՅՏԱՐԱՐԷ «ԽՕՍՔ ԱՌ» ՄՐՑԱՆԱԿԻՆ ԱՐԴԻՒՆՔՆԵՐԸ

Գալուստ Կիլպենկեան Հիմնարկության Հայկական Բաժանմունքը ապրիլ 2020-ին մեկնարկեց Խօսք Առ մրցանակը: Այս իւրայատուկ նախաձեռնութիւնը – եզակի իր տեսակին մէջ – հրաւիրեց աշխարհասփիւռ հայախօսներ ներկայացնելու տարբեր տեսակի նորարար լսատեսողական եւ գրական արտադրութիւններ, որոնք կը մղեն հայերէնով մտածելու եւ հայերէնով արծարծելու մարդկութեան դիմագրաւած այսօրուան հիմնահարցերը:

Ստացանք տասնըութ յերկիրներէ եւ տարբեր ձեւաչափերու 165 դիմում. շարժանկար ու շարանկար, երգ ու երգիծանք, ծաղրանկար, բանաստեղծութիւն, արձակ, տեսահոլովակ, զանազան ձեւաչափերով արտադրութիւններ եւ աւելին: Ամենէն երիտասարդ դիմողը ութ տարեկան էր, իսկ ամենէն տարիքովը՝ ութսուններեք: Եօթ հոգիէ բաղկացած ներքին յանձնախումբը մեծ հետաքրքրութեամբ արժեւորեց բոլոր դիմումները, ու որոշեց յատկացնել վաթսուն մրցանակ: Տրուած ըլլալով որ բազմաթիւ էին հետաքրքրական եւ որակեալ դիմումները, յիսունի փոխարէն տրուեցաւ վաթսուն մրցանակ. քսանհինգ մրցանակ Հայաստանէն դիմողներու, եւ երեսունհինգ Սփիւռքէն դիմողներու, որ կը համապատասխանէ դիմողներուն քանակին:

Խօսք Առ մրցանակին հիմնական նպատակներէն էր խթանել բոլոր տարիքի եւ տարբեր հետաքրքրութիւններ ունեցող մարդոց մտածելու հայերէնով եւ լեզուն գործածելու ստեղծագործ եւ այլազան ձեւերով: Այս չափանիշերը, ինչպէս նաեւ ներկայացուած գործին կարողականութիւնն ու հոն արտայայտուած միտքերուն թարմութիւնը գնահատումի հիմնական չափանիշերն էին: Ասոնց առջնութիւն, յանձնախումբը նաեւ նկատի առաւ դիմողներուն տարիքը, բնակութեան վայրը եւ ներկայացուած աշխատանքներուն ձեւաչափը: Մրցանակակիրներու ընտրութեան գործընթացքը իսկական մարտահրաւեր մըն էր յանձնախումբին համար:

Յատկապէս ուրախ ենք որ մեծ քանակով երիտասարդներ դիմեցին Խօսք Առ մրցանակին՝ ստեղծագործ աշխատանքներով ուր հիմնական արտայայտչամիջոցը հայերէնն էր: Մեծ ուրախութիւն է նաեւ տեսնել թէ այս մրցանակին շնորհիւ կը գոյանայ հայերէնով ստեղծագործելու փափաք մը. հայ երիտասարդ եւ ստեղծագործ միտքեր կը սկսին փնտռել իրենց նմանները եւ կը փափաքին, կապ հաստատելով, կորիզ մը կազմել: Մասնակիցներէն մէկը շատ դիպուկ ամփոփեց մրցանակին միտք բանին՝

«Շատ ուրախ եղայ դպրոցը աւարտելէս 10 տարի յետոյ առաջին անգամ ըլլալով նման նիւթերու մասին հայերէն գրելով: Այլ լեզուներով միշտ կը գրեմ, բայց երբեք չէի մտածած որ հայերէն ալ կարելի է գրել: Կը կարծէի թէ մոռցած եմ, առաջին բառերը դժուարութեամբ էլան բայց քանի մը վայրկեան յետոյ ամէն բան վերոյիջեցի: Ասանկ առիթ մը պէտք էր միայն :))»

Շնորհակալութիւն կը յայտնենք բոլոր մասնակիցներուն եւ կը շնորհաւորենք բոլորը:



CALOUSTE GULBENKIAN
FOUNDATION
ARMENIAN COMMUNITIES

[Այստեղ](#) կը գտնէք միջանակ ստացողներուն ցանկը, իսկ [այստեղ](#) կրնաք գտնել հետաքրքրական վիճակագրութիւն միջանակին դիմողներուն մասին: Կը ներկայացնենք նաեւ քանի մը միջանակակիրներու ինչպէս նաեւ ոչ միջանակակիրներու խօսքերը. բարի ընթերցում: